

# MASA TETAP BAGI KEMERDEKAAN MALAYA HENDAKLAH DIISYTHARKAN

Kedatangan tahun baharu Masihi 1953 ini, sekalilah membawa erti yang besar dan bercemerlang kepada Malaya amnya dan orang-orang Melayu khasnya lebih lagi mesti bercemerlang manakala kedatangannya ialah di tengah-tengah keadaan Malaya dan bangsa Melayu sedang bergerak dengan masa menuju kepada kemerdekaan manakala tahun 1952 yang telah lenyap itu telah meninggalkan riwayat, buruk baiknya bagi menjadi peringatan dan keinsafan bagi yang mahu insaf, adalah kedatangan tahun 1953 ini segayalah membawa perubahan-perubahan yang bererti, perubahan yang memenuhi kekurangan yang tertinggal, perubahan yang membaiki keburukan yang lalu dan perubahan yang menepati dengan segala janji dan tanggungan kerajaan British terhadap Malaya dan anak negerinya. Masa yang sehabis ringkas dan tetap bagi kemerdekaan Malaya itu mendapat diisytharkan.

-Oleh Abham-

### Menuju Kemerdekaan

Malaya sedang menuju kemerdekaan. Cita-cita dan perjuangan bangsa Melayu menuju ke arah kemerdekaan itu. Bukanlah semata-mata perkara cita-cita sahaja akan tetapi adalah sedang menjadi hakikat yang terbentang di hadapan dunia luar pada hari ini. Yang Teramat Mulia Tengku Abdul Rahman dan rakan-rakannya dari Tanah Melayu ini yang telah pergi menghadiri Persidangan Keamanan Dunia di Tokyo. Di dalam tahun yang lalu, telah meluaskan cita-cita bangsanya itu di hadapan wakil-wakil dunia luar itu dan telah mendapat bukan sahaja sambutan yang baik akan tetapi juga sokongan semangat dari segala bangsa yang menghadiri persidangan itu. Dengan demikian juga segala rahsia yang selamanya harus telah tersembunyi dari pemandangan luar berkenaan dengan apa yang ada dengan sebenarnya di dalam siasah Tanah Melayu ini dan apa yang dirasai oleh umat bangsa Melayu dari penjajahan itu telah menjadi ketara kepada dunia luar dan perkara ini tiada boleh dicuba hendak dikecil-kecilkan atau hendak diambil bina tak bina oleh pihak yang berkenaan dengan hal keadaan di Tanah Melayu ini.

Pendeknya buruk baik keadaan di Tanah Melayu ini dan betapa bersungguh-sungguh pihak bangsa Melayu sedang berjuang hendak melepaskan dirinya dari penindihan yang selama ini

terhempap ke atasnya, telah ketara kepada dunia luar dan tidaklah dapat disembunyikan lagi. Hanyasanya tidaklah ada sebarang langkah di dalam hal ini melainkan membentulkan sahaja soal yang diperjuangkan oleh bangsa Melayu itu iaitu dengan meletakkan semula hak bangsa Melayu ke tangan bangsanya dan mewujudkan kerajaan Malaya merdeka dengan segera. Menyegerakan kemerdekaan Malaya itu itulah jalan yang baik sekali bukan sahaja bagi memuaskan bangsa Melayu yang sedang di dalam perjuangan itu akan tetapi memelihara nama baik British kepada dunia luar juga.

Kerajaan British memang berulang kali berikrar. Hendak memberi kemerdekaan itu. Sekarang telah tiba masanya ikrar itu diertikan dengan perbuatan.

Sekiranya kerajaan British sebenarnya telus ikhlas dan bermaksud benar dengan apa yang diikrarkan berkenaan dengan Tanah Melayu ini. Tiadalah ada sebab lagi bagi berhelah-helah dan melengahkannya.

Kedatangannya tahun baharu ini. Segayalah menyaksikan suatu perisytiharan masa yang tetap dan sehabis segera bagi kemerdekaan Malaya itu dari kerajaan British, janji lepas janji itu telah lama dibuat dan tiada memberi erti lagi. Kerajaan British telah beberapa

kali bertukar tangan daripada konservatif kepada liberal dan dari *labour* kepada konservatif akan tetapi dasar kerajaannya terhadap Malaya ini selamanya tetap begitu juga dan anak-anak negerinya dan penduduk Malaya hanya diberi kemerdekaan janji jua.

Sekarang Tuan Churchill, orang kuat Britain sedang memegang teraju kerajaan British itu dan Tuan Churchill harus akan mendapat keyakinan dunia amnya dan Malaya khasnya sekiranya ia membuat suatu langkah yang bijak dan berani terhadap memerdekaan Malaya ini. Sebagaimana Tuan Adler telah memerdekaan India, Pakistan, Burma dan Silone itu. Mengisyiharkan suatu masa yang tetap dan segera dan memerdekaannya, apabila genap masanya itulah sahaja perbuatan yang dituntut kepada Tuan Churchill dan kerajaannya. UMNO telah menuntut masa tiga tahun bagi diadakan sebuah kerajaan peralihan. Tuntutan UMNO ini ialah suatu tuntutan yang mustahak dan sayogialah menyedarkan pihak British dan menggerakkan langkahnya pada jalan yang betul iaitu memberi layanan yang mustahak. Sekiranya sesuatu langkah tidak dibuat dalam hal ini, bukan sahaja bererti pihak British belum bersedia hendak menunaikan janjinya. Akan tetapi juga menunjukkan suatu perbuatan munafikin. Hak Melayu di atas tanah airnya dan yang demikian adalah menentang keadilannya dan kebenaran sebagaimana juga menentang semangat dan timbang rasa Kongres Keamanan Dunia di Hiroshima itu. Adakah kerajaan British bersikap menentang keamanan?

### **Layanan-layanan yang dikehendaki**

Di antara kehendak-kehendak yang besar di dalam masa yang ada ini bagi membantu di dalam membina kemerdekaan yang tak dapat dielakkan itu, adalah membuka pintu jawatan kerajaan dengan seluas-luasnya dari yang serendah-rendah hingga yang setinggi-tingginya kepada anak-anak Melayu. Segala had dan halangan yang menyekat anak-anak Melayu memperolehi peluang itu hendaklah dikapuskan dengan segera. Kemasukan

pegawai-pegawai British, dengan beberapa bolehnya, hendaklah diberhentikan. Anak-anak Melayu hendaklah diberi jawatan-jawatan walaupun dengan cara berlatih, pada mulanya dan dengan demikian bolehlah mereka itu dapat melayakkan diri pada akhirnya. Segala helah dan alasan yang mengatakan orang Melayu tidak layak atau belum ada yang layak adalah semata-mata helah perdaya. Orang-orang Melayu sebenarnya tidak diberi peluang dan tidak dicuba kebolehannya. Belum dicuba belum diketahui layak tidaknya. Kalau cuba baharu tahu.

Peluang pelajaran hendaklah diluaskan kepada anak-anak Melayu sebagaimana juga jalan-jalan membantu memajukan pelajaran anak-anak Melayu dan mencergaskan otaknya. Hendaklah diadakan dengan apa ikhtiar jua yang mustahak. Dasar pelajaran hendaklah dasar yang sesuai dan yang membentuk rakyat yang boleh berdiri sendiri dan merdeka.

Ekonomi bangsa Melayu, hendaklah dibantu dengan segala ikhtiar dan bantuan yang berkesan yang bukan sahaja pada membolehkannya di atas aras yang kukuh bahkan juga pada mengembangkannya. Bantuan ekonomi hendaklah diberi dengan memandang dari punca-punca kelemahannya dan membaiki kelemahan-kelemahan itu. Perusahaan-perusahaan Melayu, sama ada di dalam pertukangan, perikanan, bercucuk tanam, mahupun perniagaan dan berlombong hendaklah diberi segala pertolongan yang mustahak dengan menyiasat apa-apa kekurangan dan apa-apa bantuan yang dikehendaki. Tiap-tiap seringgit dibelanjakan kepada pekebun-pekebun sayur Cina yang ditempatkan semula dan sebagaimana besar belanja yang dijalankan kerana dharurat, begitulah hendaknya dibelanjakan untuk kebajikan anak negeri, orang-orang Melayu.

Darurat tidaklah dikehendaki menjadi sebab atau alasan bagi menahan atau meninggalkan kerja-kerja atau pertolongan-pertolongan di dalam segala hal ini, sebagaimana tidak dikehendaki di dalam soal yang lain-lain juga. Jikalau jumlah wang yang banyak boleh dicurahkan kepada memberi faedah kepada orang-orang Cina pekebun-pekebun sayur itu di dalam masa darurat, mengapakah tidak boleh dibelanjakan wang yang sebanyak itu juga untuk

faedah orang-orang Melayu, anak negeri?

Sebagai penaung dan sebagai pihak yang sanggup memimpin bangsa Melayu ke arah berdiri sendiri, sebagaimana yang dijanji-janjikan itu adalah menjadi kewajipan pihak British menyaksikan segala hal dan perkara ini mendapat layanan yang sebaik-baiknya dan itulah jua cara memelihara nama baik Brisith dan menarik kepercayaan dunia amnya dan Melayu khasnya kepadanya.

### **Alasan perkauman**

Sudah menjadi suatu pegangan nampaknya, soal perkauman itu dijadikan alasan oleh orang-orang yang bertanggungan British pada memberi kemerdekaan kepada Malaya. Dengan tiada munasabah bahkan tiada berasas, pegawai-pegawai British yang bertanggungan dengan Malaya ini, di London, mendakwakan, kemerdekaan Malaya tidak dapat hendak disempurnakan kerana yang demikian akan membangkitkan pertumpahan darah dan manajala pergaduhan besar akan berlaku di antara Melayu dan Cina di Malaya ini. Sementara itu tidak sunyi pula rencana-rencana dari orang-orang yang dikatakan cukup faham di dalam hal ehwal Malaya ini, sentiasa tersiar di surat-surat khabar atau majalah-majalah di England yang mengatakan, kononnya, pergaduhan Cina Melayu sedang menjadi-jadi di Malaya ini. Rencana-rencana yang seumpama itu, bukan sahaja semata-mata dakyah yang mengelirukan akan tetapi juga itulah suatu helah yang sengaja dibuat untuk menguatkan alasan kepada dakwa soal perkauman itu sedang buruk di Malaya dan itulah penghalang besar kepada kemerdekaan Malaya yang segera, jika pun hendak diberi, atau tidak ada kemerdekaan yang boleh meyakinkan sama sekali.

### **Penggalak perkauman**

Soal perkauman itu, sebenarnya timbul bukan dengan semangat perkauman yang sebenar dari kaum-kaum yang berkenaan itu melainkan ialah timbulnya dengan rupa menggalakkan perkauman jua. Rencana-rencana yang mengatakan pergaduhan Melayu – Cina dan

seumpamanya sedang menjadi-jadi di Malaya ini. Yang tiada berasas itu, itulah sendiri yang menggalakkan perkauman itu, manakala dakwa atau rencana itu adalah semata-mata bermakna melaga-lagakan dua kaum yang besar itu dan syak mensyakkan di antara satu dengan lain dan bermusuh-musuh.

Apa yang ditulis oleh Doktor Percil, baharu ini, yang menentang Sir Jeneral Templer, adalah suatu daripada sebesar-besarnya penggalak perkauman. Yang terbit dari Doktor Percil itu, parti rencana Percil itu adalah mengandungi benih membangkitkan kemarahan atau perasaan sakit dari suatu pihak ke atas sesuatu pihak di antara Cina dengan Melayu, lain tidak. Masakan orang-orang Cina dan orang-orang Melayu begitu bodoh akan terpengaruh dengan perbuatan melaga-laga itu. Bagaimanapun, begitulah soal perkauman itu, dengan sebenarnya. Bukanlah ada hakikat yang sebenar melainkan diada-adakan kerana maslahat memecah-memecah dan memerintah di Malaya itu. Akan tetapi yang merbahayanya ialah perbuatan mengada-adakan cerita pergaduhan Cina – Melayu iaitu mengada-adakan perkara yang tidak, itu membawa dunia luar percaya dan menguatkan alasan sebagai sebab Malaya tidak boleh mencapai kemerdekaan.

Di dalam hal ini, lagi sekali pihak British boleh menunjukkan tulus ikhlasnya dengan menghapuskan segala kejadian yang seumpama ini.

### **Apa hal Melayu?**

Di dalam hal-hal yang berlaku ini, keadaan orang-orang Melayu sendiri adalah suatu perkara yang menjadi soal kepada orang-orang yang berkesedaran dan pemimpin-pemimpin Melayu hari ini.

Semangat kemerdekaan itu, sedang menjadi daging darah kepada orang-orang Melayu yang berkesedaran dan “merdeka” itulah jua yang menjadi tumpuan perjuangan pemimpin Melayu sekarang. Begitulah cita-cita itu bukanlah tersimpan sebagai cita-cita sahaja akan tetapi adalah sedang menjadi perkara yang diperjuangkan dengan azam yang teguh dan keyakinan yang

(sambungan pada muka 34)

di Malaya. Betapakah kelak fikiran mereka terhadap rencana pengarang surat khabar al-Yawm yang berpengaruh di Mesir itu sebagaimana disebutkan di atas?

Bagi kita dan juga bagi semua orang di lain-lain tempat di seluruh dunia fikiran seperti ini adalah menjadi makanan otak. Fikiran serupa ini memang sangat payah hendak dimasukkan dalam kepala, di fikiran dan diterima biasanya Mesir, di samping Arab, adalah dipandang sebagai negara yang menjadi punca undang-undang dan sejarah Islam, dan sekarang mungkinkah Mesir tidak dapat lagi dianggap pemimpin negeri-negeri Islam?

Sekarang oleh kerana surat khabar Mesir al-Yawm yang

berpengaruh itu sudah terang-terang menentang fatwa-fatwa "dogmatik" (taqlid buta) dari ulama-ulama al-Azhar itu, maka perubahan dalam pandangan orang-orang Islam terhadap agama mulai timbul dan ini adalah satu ujian serta panggilan kepada sekalian orang Islam untuk mengikuti peredaran masa.

Malaya sepatutnya boleh mengikuti kesedaran bahawa dalam agama Islam ini yang semenjak berabad-abad yang lalu telah tertolak ke belakang dan kita suka jika ulama-ulama di Malaya dapat memberi ulasan-ulasan mereka tentang sikap baharu terhadap agama sebagaimana yang telah dimulakan oleh pengaruh baharu orang kuat Mesir, Jeneral Najib. Mahukah atau tidak ulama-ulama Malaya mengikut sikap Najib?

---

(Sambungan daripada muka 17)

penuh yang berkehendakkan sokongan yang penuh di dalam perjuangan yang hebat ini, segala tenaga dan perolehan dan kebolehan bangsa adalah sangat dikehendaki dan dikorbankan "keyakinan yang penuh di atas kejayaan, kepercayaan yang teguh di atas kebolehan bangsa dan kebulatan cita-cita merdeka adalah semuanya dikehendaki ditumpukan di dalam perjuangan bangsa itu dan semuanya dikehendaki dengan semangat yang ikhlas dan kerana bangsa. Akan tetapi bagaimanakah keadaan Melayu sekarang? Berbagai hal dan keadaan sedang didapati setengah-setengah orang yang mengaku pemimpin, bukan memimpin kepada jalan bersatu melainkan berpecah. Bukan sahaja kerana bangsa melainkan kerana maslahat diri pertubuhan atau parti ada sahaja ditubuhkan dan ada yang sedang di dalam cadangan dan di dalam cadangan-cadangan itu, yang peliknya, ada pula cadangan hendak menubuhkan parti politik yang tiada berdasar kemerdekaan akan tetapi telah ditegaskan dengan jelas untuk menentang sebuah pertubuhan politik lain.

Sementara itu golongan yang mengaku alim ulama, sibuk dengan bertengkar dengan masalah-masalah yang lama yang tiada pernah diputuskan. Bukan itu sahaja akan tetapi sudah berlaku puak-puak kerana dalil, tiada mahu tunduk kepada orang lain atas jalan yang membuka mata dan hati semata-mata

kerana menjaga maslahat diri, kepada golongan ini soal kebangsaan dan negara tiada menjadi perhatian dan sebaliknya dicela pula pihak yang mengutamakan perkara-perkara ini. Politik dan tuntutan tanah air tiada menjadi kewajipan kepada mereka apatah lagi menjadi sebahagian dari soal agama.

Setengah daripada orang besar-besar dan pegawai-pegawai kerajaan yang mereka adalah sebagai pemimpin rakyat, bukan sahaja asyik mengejar-mengejar pangkat akan tetapi juga tiada hendak mencampurkan diri dengan orang-orang kebanyakan. Hanya bercampur gaul dengan orang-orang yang berpangkat dan menjauhkan diri, sama ada di dalam pergaulan mahupun di dalam majlis-majlis dengan orang kebanyakan yang pada pandangan mereka harus tidak setaraf dengan mereka itu. Bukan setakat itu sahaja akan tetapi setengah-setengahnya menjadi perkakas bagi menindih bangsa sendiri.

Apakah harapan bangsa kepada orang-orang yang seumpama itu lain tidak melainkan ialah halangan di dalam pergerakan bangsa jua. Semuanya ini dan segala kejadian-kejadian yang akan berlaku kelak di Tanah Melayu ini adalah mesti diperhatikan oleh orang-orang Melayu dengan insaf dan kesedaran dengan memikirkan apakah akan jadi kepada bangsa dan tanah air sambil menentukan apakah mesti dibuat dan apakah kewajipan sendiri